

MATTHIÆ NETHENI

JUDICIUM,

De libro *Ludovici Wolzogii.*

INTRODUCTIO.

Dominus noster Jesus Christus in altum ascendens Ecclesiæ suæ varios reliquit & dedit Ministros, tum extraordinarios, tum ordinarios, ad coagmentationem sanctorum & ad ædificationem Ecclesiæ, quæ est mysticum ipsius corpus *Eph. 4. 10. 11. 12.* Idque opus pulchrè procedit, quando Doctores & Antecessores Ecclesiæ ipsi Spiritum Christi habent, qui ipsos illuminat & sanctificat, ut sensum Christi teneant, ejus gloriam Ecclesiæque ædificationem, tanquam summum Ministerii sui scopum, præ oculis habeant; nec se suamque gloriam, laudes, emolumenta, favorem gratiam & applausum hominum, pacem & commoda temporalia, promotionem sui & suorum in hoc mundo, sed quæ sunt Christi & Ecclesiæ ipsius in primis ex animo quærant, cæteraque sua in secundis habeant, & si causæ Christi officiant, etiam planè negligant & contemnant: Sicut Paulus fidelis Christi Apostolus cum alibi tum etiam Thessalonicæ fecit *1. Thess. 1. primis 12. versibus.* Quò etiam pertinet, ut animo bene composito studeant servare unitatem Spiritus, per vinculum pacis *Eph. 4. 3.* caveantque sanam fidei & morum doctrinam, in

A Ecclesia